

四庫全書

子部

欽定四庫全書

子部

太平御覽卷二百

四十五
四十二

詳校官侍讀學士臣沈熾熙

員外郎臣牛稔文覆勘

總校官降調編修臣倉聖脈

校對官學正臣常循

謄錄監生臣滿河

欽定四庫全書

太平御覽卷二百四十一

職官部二十八

雜號將軍下

建威將軍

奮武將軍

揚威將軍

宋 李昉等 撰

奮威將軍

振威將軍

建武將軍

輕車將軍

伏波將軍

材官將軍

折衝將軍

虎威將軍

偏將軍

裨將軍

虎牙將軍

漢臣將軍

討虜將軍

破虜將軍

建義將軍

刺姦將軍

輔威將軍

揚化將軍

安漠將軍

輔漢將軍

都護將軍

立義將軍

中堅將軍

厲威將軍

盪寇將軍

討逆將軍

輔吳將軍

盪魏將軍

鷹揚將軍

牙門將軍

中將軍

中領軍

中護軍

北軍中候

朱衣直閣

直寢

直後

直齋

監軍

建威將軍

東觀漢記曰光武以耿弇為建威大將軍從征雒陽

奮威將軍

魏志曰呂布殺董卓王允以布為奮威大將軍儀同三司

又曰沮授說袁紹即表為奮威將軍

奮武將軍

吳志曰賀齊傳豫章東部民彭才李玉王海等起為亂賊衆萬餘人齊討平之誅其首惡餘各降服揀其精健為兵次為縣戶遷奮武將軍

振威將軍

魏志曰太祖以程昱為振威大將軍破袁譚袁尚

揚威將軍

魏志曰臧霸字宣高泰山人也從太祖討孫權於濡須

口與張遼為前鋒行遇霖雨大軍先反水遂長賊船稍
近將士皆不安遼欲去霸止之曰公明於利鈍寧肯捐
吾等耶明日果有令遼至以語太祖太祖喜之拜霸揚
威將軍

建武將軍

魏志曰太祖以夏侯惇為建武將軍

又曰文帝善孟達姿容觀以為建武將軍

輕車將軍

漢書曰武帝元光七年以公孫賀為輕車將軍屯馬邑

伏波將軍

環濟要略曰伏波舩涉江海欲浪伏息也

漢書曰武帝元鼎五年以路博德為伏波將軍伐南越

呂嘉

東觀漢記曰光武以馬援為伏波將軍

魏志曰夏侯惇為伏波將軍領河南尹使得以便宜從事不拘科制太祖常與同載特見親重出入卧内諸將

莫得比也

王隱晉書曰武帝以孫琇為伏波將軍

材官將軍

漢書曰武帝以李息為材官將軍軍馬邑

折衝將軍

魏書曰武帝以樂進為折衝將軍

虎威將軍

魏志曰于禁字文則泰山人將軍王朗異之薦禁才任

大將太祖名見與語拜軍司馬後拜虎威將軍

吳志曰朱然字義封從孫權討關羽別與潘璋到臨沮擒羽遷昭武將軍封西安鄉侯虎威將軍呂蒙病篤權問曰卿如不起誰可代者蒙對曰朱然膽守有餘愚以為可任蒙卒權假然節鎮江陵

齊書曰柳世隆元景子也出為虎威將軍上庸太守帝謂元景曰卿以虎威之號為隋郡今復以授世隆使卿門世不絕公也

偏將軍

漢書曰吳漢字子顏南陽宛人家貧以販馬自業素聞世祖長者獨欲歸心及世祖於廣阿拜漢為偏將軍

又曰臧宮字君翁潁川人也從世祖征戰諸將多稱勇世祖察宮勤力少言甚親納之及至河北以為偏將軍吳志曰陳武字子烈廬江人孫策在壽春武修謁時年十八長七尺七寸及權統事尤為權所愛拜為偏將軍又曰董襲字元代會稽人長八尺武力過人拜偏將軍

裨將軍

魏志曰李通字文達江夏平春人以遊俠聞於江汝之間屬連歲大饑通傾家振施與士分糟糠建安初通舉衆詣太祖于許太祖討張繡通為先登大破繡軍拜裨將軍

虎牙將軍

漢書曰宣帝以雲中太守田順為虎牙將軍伐匈奴
范曄後漢書曰蓋延字巨卿漁陽人也身長八尺邊俗

尚勇力而延以氣聞與吳漢同歸世祖從平河北世祖
即位拜虎牙將軍

漢臣將軍

東觀漢記曰上於大會中指王常謂羣臣曰此家率下
江諸將輔翼漢室心如金石真忠臣也是日以常為漢
臣將軍與諸將絕席

討虜將軍

東觀漢記曰光武以王霸為討虜將軍擊董憲

破虜將軍

魏志曰李典字曼成山陽鉅野人為破虜將軍典好學問貴儒雅不與諸將爭功敬賢士大夫恂恂若不及軍中稱其長者

建義將軍

東觀漢書曰光武以朱祐為建義將軍攻朱鮪

刺姦將軍

東觀漢記曰光武以軍市令祭遵為刺姦將軍

范曄後漢書曰岑彭字君然南陽棘陽人也後世祖拜為刺史將軍使督察衆營授以常所持節

輔威將軍

東觀漢記曰光武以臧宮為輔威將軍

揚化將軍

東觀漢記曰光武以堅鐔為揚化將軍

安漢將軍

蜀志曰糜竺字子仲益州既定拜為安漢將軍班在軍

師將軍之右竺雍容敦雅而翰翮非所長是以待之上賓之禮未曾有所統御然賞賜優寵無與為比

又曰王平字子均諸葛亮卒於武功軍退還魏延作亂一戰而敗平之功也遷安漢將軍

輔漢將軍

東觀漢記曰光武以鄧奉為輔漢將軍

都護將軍

魏志曰曹洪累從征討為都護將軍

立義將軍

魏志曰龐德以衆降太祖聞其驍勇拜為立義將軍

中堅將軍

魏志曰太祖以許褚為中堅將軍又以張遼為行中堅將軍

厲威將軍

魏志曰太祖征荊州還留滿寵行厲威將軍

盪寇將軍

蜀志曰張嶷字伯岐自越雋徵詣成都民夷戀慕泣涕過旄牛邑邑君襁負來迎及追尋至蜀郡界其督率隨嶷朝貢百餘人嶷至拜盜寇將軍慷慨壯烈士人多貴之

討逆將軍

吳志曰曹公表孫策為討逆將軍

輔吳將軍

吳志曰孫權以張昭為輔吳將軍

沈約宋書曰吳置輔吳將軍班亞三司

盪魏將軍

吳志曰呂據太元元年大風江水盛溢流漸淹城門權使視水獨見據使人取大船以備害權嘉之拜盪魏將軍

鷹揚將軍

晉書曰郭奕咸寧初遷雍州刺史鷹揚將軍尋假赤幢曲蓋鼓吹

牙門將軍

蜀志曰魏延字文長義陽人也以部曲將隨先主入蜀數有戰功遷牙門將軍

中將軍

北齊書曰沙苑之敗崔仲文持馬尾而渡河波中乍沒乍出高祖望見之曰崔掾也遽遣船赴接既濟勞之曰卿為親為君不顧萬死在家之孝子即國之忠臣加中將軍

中領軍

魏略曰中領軍延康中置故漢北軍中候之官

又曰太祖以史渙忠勇為中領軍將禁兵

又曰太祖還長安以曹休為中領軍

又曰文帝征孫權以尚書令陳羣為中領軍

晉書曰吳隱之為中領軍清儉不華每月初得祿裁留身糧其餘悉分賑親族家人績紡以供朝夕時有困絕或併日而食恒布衣不完妻子不霑寸祿

晉中興書曰羊祜字叔子遷中領軍悉統宿衛入直殿中執兵之要事兼內外

齊書曰蕭景先武帝少時與景先共車行泥路車久故壞至領軍府西門車轅折俱狼狽景先謂帝曰兩人脫作領軍亦不得忘今日艱辛及武帝踐阼詔以景先為領軍拜日羽儀甚盛傾朝觀屬拜還未至府門中詔相問領軍今日故當無折轅事耶景先奉謝

梁書曰臧盾遷中領軍領軍營天下兵要監局事多盾

為人敏贍有風力長於撥繁職事甚理天監中吳平侯蕭景居此職著聲稱至是盾復繼之

三國典畧曰齊左僕射祖珽附陸令萱求為領軍齊主許之侍中斛律孝卿謂上洛王元海侯呂芬等云珽是漢兒兩眼盲豈合作領軍也海遂入啟之珽言於齊主云元海與臣素有隙必是元海譖臣齊主曰然珽列元海共太府少卿李叔元平淮令張叔畧等結朋樹黨陸令萱又唱和之遂除元海為鄭州刺史叔元為襄城郡

守叔略為南營州錄事叅軍珽遂獨處機衡總知兵事
齊主亦令中要人扶持出入每同御榻論決朝政

高堂隆集曰己巳詔書中領軍游擊皆青玉佩

中護軍

史記曰漢高帝以陳平為護軍中尉盡護諸將

漢書曰護軍都尉秦官元狩四年屬大司馬元壽元年
更名司寇元始元年更名護軍

魏志曰韓浩字元嗣以忠勇顯為中護軍掌禁兵置長

史司馬從太祖討張魯魯降議者以浩智略足以綏邊
欲留使都督諸軍鎮漢中太祖曰吾安可以無護軍乃
與俱其見親如此

王隱晉書曰鄧攸遷吏部尚書牧馬於家庭妻子素食
當時清淨內外肅然遷為中護軍

晉起居注曰武帝太始七年詔曰中護軍職典武選宜
得堪幹其事者左衛將軍羊琇有明贍才見乃心在公
其以琇為中護軍

晉中興書曰司徒王導將以趙永為中護軍孔愉謂導曰中興以來處此官者周伯仁應思遠今誠乏才豈可以趙永居之其秉政不撓皆此類也

世語曰夏侯玄世名知人為中護軍拔用武官無非俊傑多牧州典郡

皇甫謐集云護軍武士之官

晉王羲之臨護軍教曰今所在要在於公役均平其差大吏忠謹在公者覆行諸營家至人告暢吾乃心其有

老落篤癘不堪從役或有饑寒之色不能自存者區分處別自當參詳其宜

北軍中候

漢書曰武帝置中壘校尉掌北軍壘門外內

續漢書曰光武中興中省壘置中候五校尉營

又曰孔文舉拜北軍中候

王隱晉書曰荀晞字道將為北軍中候

又曰太祖永昌元年以鍾雅為北軍中候五年省併領

軍

晉中興書曰陶回字恭之王導以回有器幹擢拜北軍中候回性不畏強禦

朱衣直閣

魏書曰元文景大司農卿康之次子除員外郎冠軍將軍朱衣直閣

直寢

後魏書曰于忠字思賢弱冠為御史文明太后臨朝刑

政頗峻忠朴直少言終無過誤尋除左中郎將領直寢
又曰楊津字羅漢弘農華陰人也本字延祚高祖賜名
焉少端謹以器度見稱為直寢

直後

後魏書曰元天穆性和厚美形貌年二十起家員外郎
領直後

蕭子顯齊書曰臨海亡命田流自號東海王逃竄會稽
鄒縣邊海山谷中立屯營官軍不能討明帝遣直後聞

人襲說降之

直齋

後魏書曰太和九年十月初置直齋

監軍

史記曰穰苴將兵扞燕晉之師苴曰臣素賤君擢之問
伍之中加之大夫之上願得君之寵臣國之所尊以監
軍景公使莊賈往苴與賈約曰日中會於軍門苴先馳
至軍立表下漏賈素驕貴夕時乃至苴遂斬賈以徇三

軍軍士皆震慄服之

東觀漢記曰光武使來歙監諸將

范曄後漢書曰宋均字叔庠為監軍時伏波將軍馬援征武溪南臨沅水軍士多病均懼衆軍疾疫矯詔迫降之諸將莫應均乃勒兵圍賊城詐為詔而降之為置長吏而歸自劾矯詔之罪帝善焉

魏志曰司馬文王征壽春使監軍石苞統卒為遊軍

晉武帝起居注曰豫州刺史胡威忠素質直思謀深與

其以威為監軍刺史如故

沈約宋書曰監軍蓋諸持節大將監領之

太平御覽卷二百四十

欽定四庫全書

太平御覽卷二百四十一

宋 李昉等 撰

職官部三十九

中郎將

五官中郎將

左右中郎將

虎賁中郎將

四中郎將

雜中郎將

凡五

都尉

奉車都尉

騎都尉

中郎將

漢書曰武帝拜張騫為中郎將使西域

又曰宣帝即位詔曰朕微眇時故掖庭張賀輔導朕躬
賀有孤孫霸七歲拜為中郎將

又曰宣帝時楊惲為中郎將郎官故事郎出錢市財用
給文書乃得出名曰山郎

山郎以資財為郎也山惲罷之所出財用故取名焉

山郎皆以法令從事有罪過輒奏免郎官化之莫不自

勵

又曰司馬相如為中郎將持節過蜀縣令負弩前導蜀人以為榮

又曰衛綰為中郎將醇謹無他孝景幸上林詔中郎將參乘還問曰君知所以得參乘乎綰曰臣代戲車士得功次遷待罪中郎將不知也

又曰張安世長子千秋與霍光子禹俱為中郎將將兵隨度遼將軍范明友擊烏桓還謁大將軍光問千秋戰

關方略山川形勢千秋口對兵事畫地成圖無所忘失
問禹不能記曰皆有文書光由是賢千秋以禹為不
才歎曰霍氏世衰張氏興矣後霍禹誅滅安世子相繼
為侍中常侍列校十餘人

又曰卜式為中郎初式不願為郎上曰吾有羊在上林
欲令子牧之式既為郎而牧羊歲餘肥息上善之式曰
非獨羊也治民亦由是矣以時起居惡者去之無令敗
羣上奇其言

東觀漢記曰更始入長安多用羣小時人為之語曰竈下養中郎將

後漢書曰董卓以呂布為騎都尉誓為父子甚愛信之遷至中郎將卓自知凶恣每懷猜畏行止嘗以布自衛小失卓意拔手戟擲之布拳捷得免而改容顧謝卓意亦解布由是陰怨於卓

蜀志曰霍峻字仲邈南郡支江人也允篤於鄉里合部曲數百人篤卒荊州牧劉表令峻攝其眾表卒峻率眾

歸先主先主以峻為中郎將

又曰劉焉字君郎江夏竟陵人少仕州郡以宗室拜中郎後以師祝公喪去官

又曰張飛字翼德涿州人也少與關雲長事先主雲長長數歲兄事之先主從曹公破呂布還許昌曹公乃俱拜為中郎將

五官中郎將

續漢書曰五官中郎將一人比二千石

主五官郎也

五官中

郎比六百石

無員

五官侍郎比三百石

無員凡官皆主吏直執戟宿衛諸殿

門

東觀漢記曰江革字次翁拜五官中郎將每朝會天子使虎賁扶持帝自禮之有疾不會輒遣太官送飧醪恩寵莫比

續漢書曰張純字伯仁遷五官中郎將純在朝歷世明習故事建武初舊章多闕每有疑議輒以訪純自郊廟婚冠喪紀禮儀多所正定帝甚重之一日或數四引見

謝沈漢書曰樊英字季齊順帝備禮徵拜五官中郎將數月以病遜位歸

應劭漢官儀曰五官中郎將秦官也秩比二千石三署郎屬焉

魏氏令曰告子文汝等悉為侯而子桓獨不封而為五官中郎將此是太子可知矣

魏志建安十五年為五官中郎將副丞相者也

左中郎將

天文錄曰郎將星若今之左右郎將也故星讚曰郎將

一星主閱具為武備

漢書曰辛慶忌字子貢從光祿大夫遷左曹中郎將
後漢書曰左宮為左中郎將擊武陵賊降凡將兵二十
餘年以性謹質朴故常見用

續漢書曰承宮遷左中郎將數進忠諫論議守正不希
世遇朝臣憚其節名稱聞於匈奴單于遣使來貢求見
宮詔勅宮自整頓宮曰夷狄眩名非識實也聞臣虛稱
故欲見臣臣醜陋形寢見必輕賤不如選長大有威容

者時以大鴻臚魏應示之

又曰楊秉字叔節以尚書侍講蔡邕字伯喈以侍中並為左中郎將

又曰皇甫嵩為左中郎將擊匈奴

漢舊儀曰左中郎將秩比二千石主謁者

右中郎將

漢書曰段會宗字子松為右中郎將

續漢書曰朱雋為右中郎將持節擊潁川長社賊

漢舊儀曰右中郎將秩比二千石主常侍侍郎

蜀志曰宗預為右中郎將將命使吳

虎賁中郎將

應劭漢官儀曰虎賁中郎將古官也書稱武王伐紂戎車三百兩虎賁三千人擒紂於牧之野言其猛怒如虎之奔赴平帝元始元年更名虎賁郎古有勇者孟賁改奔為賁中郎將冠兩鶡尾鶡鷄鳥中之異勁者也每所攫撮應爪摧碎鶡尾上黨所貢

周禮夏官下曰虎賁氏掌先後王而趨以卒伍軍旅會同亦如之舍則守王閑

尚書牧誓曰戎車三百兩虎賁三千人與紂戰于牧野作牧誓

周書曰古有虎賁士千人以牛投牛以馬投馬以車捧車

漢書百官表曰期門僕射秩比千石平帝元始元年更名虎賁郎置中郎將秩比二千石

東觀漢記曰馬援從隴西太守遷虎賁中郎將

又曰馬后不以私家干朝廷兄為虎賁中郎將訖永平世不轉

又曰明太后姊子夏壽等私呼虎賁張鳴與教戲爭鬪上特詔曰爾虎賁將軍蒙國厚恩位在中臣宿衛禁門當進人不避仇讐舉罰不避親戚今者反於殿中交通輕薄虎賁蘭內所使至命欲相殺於殿下避門內畏懦恣縱故不逐捕此皆生於不學之門所致也

又曰馬廖任倮皆從羽林監遷虎賁中郎將

續漢書曰魯國孔融為北軍中候三日遷虎賁中郎將

又曰虎賁中郎將比二千石

主虎賁宿衛也

左右僕射左右陞

長各一人

僕射主虎賁郎將陞長主直虎賁朝會在殿之下

又曰虎賁武騎皆鵠冠虎文單衣褰邑歲獻織成虎文雲鵠者勇雉也其鬪死乃止

又曰虎賁中郎將秩比二千石虎賁中郎比六百石虎賁侍郎比四百石虎賁郎中比三百石節從虎賁比二

百石皆無員數掌宿衛侍從虎賁武騎皆鵠冠虎文單衣

謝承後漢書曰建武十八年夏旱公卿皆暴露請雨洛陽令着車蓋出門候何湯將衛士鈎令車收案有詔免令官拜湯虎賁中郎將上常歎曰赳赳武夫公侯干城何湯之謂也

漢官典職曰虎賁中郎將主虎賁千五百人郎多至千人

漢名臣奏曰丞相薛宣奏漢興以來深考古義推萬變之備於是制宣室出入之義正輕重之罰故司馬殿省闕至五六里周衛擊刁斗禁門自近臣侍側尚不得著劍入防未然也陛下聖德純備海內晏然此國家之明制必前後備虎賁

漢舊儀曰期門騎者隴西工射獵人及能用五兵仗刀三百人王莽以為虎賁郎

劉謙之晉紀曰桓公欲復虎賁中郎將疑應直與不訪

之僚佐咸莫能定叅軍劉蘭之對曰昔潘岳為秋興賦序云兼虎賁中郎將寓直於散騎之省以此言之是直官也

後魏書曰韓茂膂力絕人尤善騎射太祖曾親征丁零翟猛茂為中軍執幢時大風諸軍旌旗皆偃仆茂于馬上持幢初不傾倒太祖異而問之徵茂所屬具以狀對太宗謂左右曰記之尋徵詣行在所試以騎射太宗深奇之以茂為虎賁中郎將

九州春秋曰袁術為虎賁中郎將張讓殺何進術斫閣起火

環濟要略曰漢武帝好微行因置期門郎與之期於殿門平帝改為虎賁中郎

張純別傳曰純字伯仁郊廟冠婚喪祭禮儀多所正定上甚重之以純兼虎賁中郎將一日數見

東中郎將

魏志曰蔣濟字子通文帝即位為東中郎將濟請留詔

曰高祖歌曰安得猛士守四方天下未寧要須良臣以鎮邊境如其無事乃還鳴玉未為後也後曹仁薨復以濟為東中郎將代領其兵詔曰卿兼資文武志節忼慨常有超越江湖吞吳會之志故復授將帥之任

西中郎將

沈約宋書曰西中郎將與南北東中郎將後漢號也

南中郎將

魏志曰鄢陵侯彰為南中郎將

又曰臨淄侯植為南中郎將

晉諸公讚曰石崇為南中郎將

北中郎將

續漢書曰盧植為北中郎將征黃巾

魏志曰代郡烏丸反以曹彰為北中郎將臨發太祖誠之曰居家為父子受事為君臣

王隱晉書曰山濤為北中郎將守鄴

晉起居注曰武帝太始二年詔鄴城守事宜速有人又

當得親親有文武器任者高陽王珪今來之國雖當出
為藩輔以才幹事亦古之制也其以珪為督鄴城守事
北中郎將

晉中興書曰荀羨為北中郎將將徐州刺史年二十八
郭泰別傳曰王叔優問才之所宜泰曰當以武官顯叔
優后至北中郎將

匈奴中郎將

續漢書曰張奐字然明與段紀明皇甫威明俱顯京師

號為涼州三明並為匈奴中郎將

司金中郎將

魏略曰河北始開治遂以王修為司金中郎將修奏記曰修聞枳棘之材無柱梁之質涓流之才無洪波之勢是以在職七年忠謹不昭於時功業不見於事力少任重不堪薦擢

典農中郎將

魏志曰任峻字伯遠為典農中郎將數年所在積粟倉

廩皆盈

又曰毋丘儉字仲恭河東聞喜人為洛陽典農時取農
民以治宮室儉上疏曰臣愚以為天下所急除者二賊
所急務者衣食誠使二賊不滅士民飢凍雖崇美宮室
猶無益也

魏畧曰上以農殖大事將選典農以徐邈為潁川典農
中郎將所在著稱

武衛中郎將

魏志曰許褚字仲康太祖與遂超等單馬會語左右皆不得從唯將褚超負其力陰欲突太祖素聞褚勇疑從騎是褚乃問太祖曰公有虎侯者安在太祖顧指褚褚瞋目眄之超不動乃各罷後數日會戰大破超等褚身斬首級遷武衛中郎將武衛之始自此始也

建義中郎將

後漢書曰袁紹傳魏郡兵反賊有陶升者自號平漢將

軍

英雄記曰升故為內黃小吏

馱反諸賊將衆踰西城入閉府門具

車重

重輜重也

載紹家及諸衣冠在州內者身自扞衛送到

斥丘

斥丘縣屬鉅鹿郡故城今相州成安縣東南十三州志云地斥鹵故云斥丘也

紹還因屯

斥丘以陶為建義中郎將

都尉

史記曰甯成家居上欲以為郡守御史大夫公孫弘曰臣居山東為小吏時甯成為濟南都尉其治如狼牧羊誠不可令治民上乃拜成為關中都尉

又曰汲黯字長孺為東海太守歲餘大治上聞召為主

爵都尉治務在無為而已弘大體不拘文法

漢書曰主爵中尉秦官掌列侯景帝中元六年更名都尉武帝大初元年更名右扶風治內史右地與左馮翊京兆是為三輔皆有兩丞

又曰韓信數以策干項羽羽弗用亡楚歸漢未得知名為連敖楚官坐法當斬信乃仰視滕公曰上不欲就天下

乎而斬壯士滕公竒壯之與語大說言於漢王以為治

粟都尉

東觀漢記曰樊曄與世祖有舊世祖嘗於新野坐文書
事被拘時曄為市吏餽餌一笥上德之后拜河東尉臨
發之官引見雲臺賜御食衣被上啗曄曰一笥餌得都
尉何如曄頓首曰小臣蒙恩特見拔擢陛下不忘往舊
臣得竭死自効

又曰任延字長孫南陽宛人更始拜為西部都尉年十
九迎吏見其少皆驚及到淡泊無為下車遣吏以中牢
具祠延陵季子時天下新定道路不通諸避世江南者

皆未還會稽多士延到皆禮之聘請高行俊又董子儀
嚴子陵等待以師友之禮行縣所到輒使勞孝子崇禮
養善如此建武之初上書言臣贊拜不由王庭願收骸
骨詔書徵延民攀持轂涕泣

漢書解詁云都尉將兵副佐太守備盜賊也

魏略曰積弩都尉秩比二千石后更為典弩都尉又有
典鎧都尉秩與弩同皆屬積弩

又曰撫軍都尉秩比二千石本校事官始太祖欲廣耳

目使虞洪趙達二人主刺舉洪達多所陷入故于時軍中
為之語曰不畏曹公但畏虞洪虞洪尚可趙達殺我後
達竟亦為人之所迫死

魏志曰韓暨為監治謁者在職七年器用充實詔書褒
歎就加司金都尉班亞九卿

吳志曰孫桓字叔武儀容端正器懷聰朗博學強記能
議論應對權常稱為宗室顏淵擢為武衛都尉從討關
羽於華容誘羽餘黨得五千人牛馬器械甚衆

臨海記曰漢元鼎五年立都尉府於候官以鎮撫二越
所謂東南一尉者也

黃帝占軍氣決曰都尉氣如合抱之榆

周紹新論曰散騎侍郎武衛都尉孫奇字仲容年十七
以秀才入侍帷幄余作詩一篇美而風之恂恂周公美
妙無已誕姿既豐世胄有紀平南之孫奮威之子

湖廣邊都尉箴曰巍巍上聖光被八埏矧惟內外罔不
來賓季末陵遲王澤壅隔戎狄作難鬼方騷遯桓桓猛

將是攘是闢殷宗周宣用顯其績大漢龍興念存治平
蕩蕩率土來同門屏守撫其民出典其戎五才並用文
武程功

奉車都尉

韋昭辯釋名曰奉車都尉奉天子乘輿辯云奉車都尉
主乘輿乘車尊不敢言主故言奉

漢書曰奉車都尉掌御乘輿車馬

騎都尉

魏略曰李豐字安國年十七在鄴下名為清白識別人
物明帝時得吳降人問江東聞中國名士為誰降人云
聞有李安國者是時豐為黃門郎上曰豐名播於吳越
耶後轉拜騎都尉

又曰畢軌字昭先明帝在東宮時軌在文學中及即位
入為黃門郎拜騎都尉

魏志曰徐晃字公明河內東陽人也為郡吏從車騎將
軍楊奉討賊有功拜騎都尉

吳志曰駱統字公緒會稽烏程人時飢荒多有困乏統為飲食衰少其姊仁愛寡婦無子見統甚哀之數問其故統曰士大夫糟糠不足我何心獨飽姊曰誠如何不告我而自苦若此乃自以私粟與統又以告母母亦賢之遂使分施由是顯名孫權以將軍領會稽太守統年二十試為烏程相民戶過萬咸歎其惠理權嘉之召為功曹行騎都尉

又曰孫權遣騎都尉趙咨使魏魏帝問曰吳王何等主

也咨對曰聰明仁智雄畧之主也帝問其狀咨曰納魯肅於凡器是其聰也拔呂蒙於行陣是其明也獲于禁而不害是其仁也取荊州而不血刃是其智也據三州而虎視天下是其雄也屈身於陛下是其畧也

又曰顧承字子直嘉禾中與舅陸瑁俱以禮徵權賜丞相雍書曰貴孫子直令問休休至與相見過於所聞為君嘉之拜騎都尉

吳志曰諸葛恪字元遜瑾長子也少知名弱冠拜為騎

都尉

太平御覽卷二百四十一

欽定四庫全書

太平御覽卷二百四十二

宋 李昉等 撰

職官部四十

諸校尉

凡三十二號

羽林監

期門僕射

冗從僕射

屯騎校尉

陶氏職官要錄曰屯騎越騎步兵長水射聲五校尉按

晉承漢置以為宿衛官各領千兵興寧三年桓溫奏省
五校尉永初元年復置以叙勲舊

東觀漢記曰劉磐字仲興屯騎校尉時五校官顯職閑
府寺寬敞輿服光麗伎巧畢給故多宗室肺腑居之

後漢書曰鄧閭妻耿氏有節操痛鄧氏誅廢子忠早卒
乃養河南尹豹子嗣為閭後耿氏教之書學遂以通博
稱永壽中與伏無忌延篤著書東觀官至屯騎校尉

蜀志曰宗預字德艷為屯騎校尉車騎鄧芝自江州來

朝謂預曰禮六十不服戎而卿受兵何也預答曰卿七十不還兵我六十何為不受耶復東聘吳孫權捉預手涕泣遺大珠一斛

晉書曰濮陽王允為屯騎校尉給千人營置長史司馬司馬無忌讓屯騎校尉表曰屯騎之任職典禁旅禦衛事重必宜其人豈臣微弱所可克堪

越騎校尉

漢書百官表曰屯兵越騎校尉如淳曰越人內附以為

騎也晉灼曰其才力超越

後漢書曰越騎校尉鄧康以太后久臨朝宗門盛滿數上書長樂宮諫爭宜崇公室自損私權言甚切至太后不從康心懷畏懼永寧元年遂謝病不朝

又曰桓郁遷越騎校尉詔勅太子諸王各奉賀致禮郁數進忠言多見納錄

又曰董卓傳越騎校尉汝南伍孚忿卓凶毒志手刃之及朝懷佩刀以見卓孚語畢辭去卓起送至閣以手撫

其背孚因出刀刺之不中卓自奮得免急呼左右執孚而大詬曰虜欲反耶孚大言曰恨不得磔裂奸賊於都市以謝天下言未畢而斃

謝承後漢書曰曹節弟破石為越騎校尉越騎營伍伯妻有美色破石欲求之伍伯不敢違妻執意不肯行遂自殺破石淫暴無道多此類也

步兵校尉

漢書曰步兵校尉掌上林苑門

東觀漢記曰崔篆王莽時為郡文學以明經徵詣公車
太保甄豐舉為步兵校尉篆辭曰聞伐國不問仁人戰
陣不訪儒士此舉奚至哉遂投劾歸

又曰梁不疑拜步兵校尉上書曰刊校之職上應天工
下厭羣望實非過少所任

梁史曰韋粲長八尺容觀甚偉初為雲麾晉安王行叅
軍後為外兵叅軍兼中兵時潁川吳仲容吳郡張率前
輩才名與粲同府並忘年交好及王為皇太子粲自記

室遷步兵校尉

魏氏春秋曰阮籍以世多故祿仕而已聞步兵校尉多美酒營人善釀求為校尉遂縱酒昏酣遺落世事

長水校尉

釋名曰長水校尉長於水戰用船之事韋昭辯云長水校尉典胡騎不主水戰也其廐近長水故以為名

東觀漢記曰賈宗字武孺為長水校尉數言便宜賞賜殊特上美宗既有武節又兼經術每燕會令與當世大

儒司徒丁鴻問難經傳

蜀志曰秦宓為長水校尉吳遣張溫來聘百官皆往餞而宓後往既至溫曰彼何人也亮曰益州學者也及至溫問宓曰君學乎答曰五尺童子皆學何必小人答問如響應聲而出溫大敬服之

王隱晉書曰下邳王晃起家為長水校尉給千人營置長史司馬

射聲校尉

漢書曰射聲校尉掌待詔射聲

應劭曰士工射者冥中聞聲射之則中因以名

也待所命而射故曰待詔射聲

東觀漢記曰班超在西域三十一年還洛陽拜為射聲校尉

續漢書曰曹褒為射聲校尉按行營舍不葬者悉為買空地葬之設祭吏士咸稱其仁

王隱晉書曰武帝詔曰射聲校尉胡奮外掌方任內參九列不宜同之長例勿使入直

何法盛晉中興書曰劉超字世踰中書侍郎遷射聲校尉時軍校無兵義興人多義隨超因領之號為君子營以實宿衛

中壘校尉

漢書曰中壘校尉

武帝置世祖中興省更置北軍中候掌兵官

掌北軍壘門

內外

胡騎校尉

漢書曰胡騎校尉掌池陽胡騎不常置

虎賁校尉

漢書曰虎賁校尉掌輕車武帝初置有丞司馬秩比二千石

城門校尉

後漢書曰赤眉與李松戰生得松時松弟汎為城門校尉赤眉使使謂之曰開城門活汝兄汎即開門

環濟要畧曰城門校尉高祖置秩二千石出從緹騎百二十人

嫖姚校尉

漢書曰霍去病以皇后姊子年十八為侍中善騎射為
嫖姚校尉

護羌校尉

東觀漢記曰鄧訓為護羌校尉諸胡皆喜義從羌胡俗
耻病死每疾臨困輒以刀自刺訓聞其困者輒拘持纏
束不與兵刃使醫藥療理愈者非一小大莫不感悅及
訓病卒官吏人羌胡愛惜旦夕臨者數千人

護烏桓校尉

續漢書曰護烏桓校尉一人主烏桓校尉比二千石
應劭漢官儀曰護烏桓校尉孝武帝時烏桓屬漢始於
幽州置之擁節監領秩比二千石

魏畧曰毋丘儉字仲恭為荊幽二州刺史持節領護烏
桓校尉

戊巳校尉

東觀漢記曰耿恭字伯宗永平中始置西域都護戊巳

校尉乃以恭為戊巳校尉

南蠻校尉

傅暢晉諸公讚曰王戎為荊州刺史揚烈將軍領南蠻校尉

南夷校尉

沈約宋書曰護南夷校尉晉武帝立領治寧州江左改曰鎮蠻校尉

西夷校尉

沈約宋書曰護西夷校尉晉武帝立治寧州江左平蜀

後治涪城終晉世

晉太康三年置永嘉中益州刺史領西夷校尉太元末殷荊州表復之又

治涪城也

西域校尉

沈約宋書曰西域校尉晉武帝置治雍州江左廢安帝

元興中又置寄治西陽

寧蠻校尉

沈約宋書曰寧蠻校尉晉安帝置治襄陽郡以授魯宗

之

護三巴校尉

齊職儀曰護三巴校尉銀印青綬虎冠絳朝服宋太始五年置以巴東巴西梓潼建平四郡隸焉建元二年省校尉改置巴州刺史

忠義校尉

吳志曰是儀從孫權討荊州拜忠義校尉儀上表陳謝權令曰孤雖非趙簡子卿安得不自屈為周舍耶

懷義校尉

吳志曰太傅馬日磾仗節安集關東在壽春以禮辟孫策表拜懷義校尉

折衝校尉

吳志曰袁術表孫策為折衝校尉行殄寇將軍

翊軍校尉

王隱晉書曰太康中伐吳還欲以王濬為五官校尉而無缺始置翊軍校尉班同長水步兵以梁益所省兵為

營

材官校尉

魏畧曰材官校尉黃初中置秩比二千石主天下材官

屬少府

驍騎校尉

魏畧曰董卓表太祖為驍騎校尉又被徵為典軍校尉

典農校尉

魏畧曰典農校尉太祖置秩比二千石

司農度支校尉

魏畧曰司農度支校尉黃初四年置比二千石掌諸軍屯田

建義校尉

吳志曰朱據傳孫權咨歎將帥追思呂蒙張溫以為據才兼文武可以繼之由是拜建義校尉領兵屯湖孰

武衛校尉

吳志曰朱才字君業為人精敏善騎射權愛異之常侍

從遊戲少以父任為武衛校尉

滅虜校尉

吳志曰賀景為滅虜校尉御衆嚴而有恩兵器精飭

西園八校尉

范曄後漢書曰中平五年初置西園八校尉

東宮三校尉

沈約宋書曰武帝永初二年置東宮屯騎步兵翊軍三

校尉

羽林監

漢書百官表曰羽林欽飛期門武帝太初元年置名曰建章營騎後更名羽林取從軍死事之子孫教以五兵號曰羽林孤兒

又曰甘延壽字君況以良家子善騎射為羽林投石拔距絕於等倫超踰羽林亭樓由是遷為郎

續漢書曰羽林左右監皆冠鶡冠

應劭漢官儀曰羽林者言其為國羽翼如林盛也一名

為嚴郎言其禦侮嚴勵其後簡取五營高才別為左右
監羽林父死子繼與虎賁同

漢雜事曰竇固以羽林監為中郎將征西羌還中郎印
綬復為羽林監

漢名臣奏曰曹褒上疏王者莫不制禮樂詔即先序禮
樂以帝新制一篇冠首擢褒監羽林左騎

魏畧曰桓範字元則為羽林左監以才學與王象等典
集皇覽

魏志曰夏侯玄字太初弱冠為黃門侍郎嘗進見與皇后弟毛曾並坐玄恥之不悅於色明帝恨之左遷羽林監

梁冀別傳曰冀妻孫壽從弟安以童幼拜黃門侍郎羽林監

期門僕射

漢書曰建元三年上微行始出北至池陽西至黃山南獵長楊東遊宜春微行常用飲酎八九月中與侍中常

侍武騎及待詔隴西北地良家子能善射者期諸殿門故有期門之號自此始也

後漢書曰陰興守期門僕射典將武騎從征伐平定郡國興每從出入常操持小蓋障翳風雨躬履泥塗率先期門光武所幸之處輒先入清宮甚見親信

冗從僕射

續漢書曰冗從僕射秩比六百石武帝置期門郎有僕射常從遊獵或以宦者為之號冗從黃門僕射居則直

門戶行則騎從桓帝永壽三年置冗從僕射


續漢志曰先臘一日大儺逐疫鬼冗從僕射將之逐惡鬼于禁中

魏志曰冗從僕射畢軌表尚書僕射王思精勤舊吏忠亮計略不及辛毗宜以毗代思

晉武起居注曰東莞王世子瑾貞固和詳有識見才幹以為冗從僕射

傅暢晉諸公讚曰司馬滕字元邁文獻王泰之第三子

也性沉壯起家為冗從僕射滕意欲業官以自顯出為
郡守



太平御覽卷二百四十二

欽定四庫全書

子部

太平御覽卷二百四十八

三至

詳校官侍讀學士_臣沈咸熙

員外郎_臣牛稔文覆勘

總校官降調編修_臣倉聖脈

校對官學正_臣常循

謄錄監生_臣甯汝櫨

欽定御覽卷

太平御覽卷

二百四十三

職官部四十一

儀同

總敘大夫

光祿大夫

中大夫

宋

李昉等

撰

特進

金紫光祿大夫

大中大夫

中散大夫

柱國

奉朝請

致仕官

儀同

東觀漢記曰鄧騭字昭伯延平元年拜為車騎將軍儀同三司儀同三司始自騭也

蜀志曰黃權降魏文帝善之景初三年拜車騎將軍儀同三司

王隱晉書曰泰始七年以鄭袤為司馬天子臨軒遣使

就第拜授衰遣息稱疾上送印綬至于十數久之見許以疾就第拜儀同三司置舍人官騎賜牀帳簾褥錢五十萬

又曰華廩為太子少傅甚得輔導之義河南尹韓壽賈后之妹夫欲以女配廩孫陶不許由是有恨故不正三司及疾篤拜儀同三司

晉起居注曰泰始八年詔曰衛將軍羊祜歷文武有佐命之勲其為車騎將軍開府如三司之儀

又曰元年詔曰中書監光祿大夫張華歷世腹心朕所
憑賴故酬其勲績使儀同三司而虛冲挹損難違高尚
其以光祿大夫儀同三司本職如故又給親信滿百人
又曰元康元年詔曰光祿大夫王戎光祿大夫裴楷開
府辟召儀同三司

晉中興書曰郝愔咸安元年拜都督浙江東五郡諸軍
事進位鎮軍開府儀同三司

又曰蔡謨免皇太后以謨為左光祿大夫開府儀同三

司遣謁者孟洪就加冊命謨上書陳謝遂以疾篤不朝
賜几杖門施行馬

齊書曰徐孝嗣加開府儀同三司孝嗣聞有詔歛容謂
左右曰吾德慙古人位登衮職將何以堪之明君可以
理奪必當死請若不獲命正當角巾丘園待罪家巷耳
固讓不受

齊職儀曰開府儀同三司置舍人官騎建初三年馬防
為車騎將軍儀同三司魏以黃權為車騎開府此後甚

衆將軍開府依大司馬朱服光祿大夫開府依司徒皂服

北史曰裴文舉武成二年就加使持節驃騎大將軍儀同三司蜀土沃饒商販百倍或有勸文舉規利文舉答之曰利之為貴莫若安身安道非貨之謂是以不為之非惡財也

後周書曰李賢遷驃騎大將軍開府儀同三司太祖之奉魏太子西巡也至原州遂幸賢第讓齒而坐行鄉飲

酒禮焉其後太祖又至原州令賢乘輅備儀服以諸侯會遇禮相見然後幸賢第歡宴終日凡是親族頒賜有差

陳書曰張昭達以平晉異功授鎮前將軍開府儀同三司初文帝嘗夢昭達升台鉉及旦以夢告之至是侍宴酒酣顧昭達曰卿憶夢不何以償夢昭達曰當効犬馬之用以盡臣節自餘無以奉償

隋書曰何稠安集嶺南有欽州刺史甯猛力師還迎軍

初猛力掘山洞欲圖為逆至是惶懼請身入朝稠以其疾篤固示無猜貳遂放還州與之約曰八九月間可詣京師相見稠還奏狀上意不懌其年十月猛力卒上謂稠曰汝前不將猛力來今竟死矣稠曰猛力共臣為約假令身死當遣子入侍越人性直其子必來初猛力臨終誠其子長真曰我與天使為約不可失信於國士汝葬我訖即宜上路長真如言入朝上大悅曰何稠著信蠻夷乃至於此以勲授開府

齊王儉拜儀同三司章曰聞日中則是盈虛之定分器滿則傾往復之常理遂乃班同衮章燮和台曜外參論道內總百司物議惟塵自識非據

梁庾肩吾為武陵王拜儀同章曰臣宅慶紫霄聯休皇極地均西月既無跡而成高仕若乘風故不行而自遠今者四郊無壘天下同文都尉春田猶居塞外單于冬獵不入漁陽臣坐牧三邊非勞七戰豈能屯兵大夏封萬里之侯飛箭聊城受千金之壽論其才望有懼茂弘

先佩印綬常羞叔度

隋江總為太保蕭公謝儀同三司表曰阪泉野戰曾無
汗馬之勞代邸運籌又闕前驅之勇薄伐專征早遊邊
外執玉奉酎久虧朝則王人降止朝冊遠臨奉述勅書
曲停表奏滄波阻曩既杜敬仲之辭闕路修長致絕趙
衰之讓心馳紫路登文石而莫由目送白雲拜承明之
未果

特進

東觀漢記曰鄧禹右將軍官罷以特進奉朝請

漢雜事曰諸侯功德優盛朝廷所敬異者賜位特進在三公下無秩

後漢書曰梁商以女立為皇后妹為貴人加商位特進更增國七賜安車駟馬

謝承後漢書曰趙典道懿尊為國師位特進七為列卿寢布被瓦器食也

晉書百官表曰特進官品第二漢制皇后之父率為此

官

傅咸奏曰公品第一執珪坐侍臣之上特進品第二執皮帛坐侍臣之下今啓特進宜執璧繼

沈約宋書曰特進衛驃騎將軍劉放衛將軍孫資等遜位以侯就第位特進其諸官加特進者從本官供給特進但為班位而已不別有吏卒車服也

齊職儀曰特進以功德特進見之

後魏書曰刁廕拜特進皇興中廕與隴西王源賀及中

書監高允等並以耆年特見優禮錫靡几杖劍履上殿
日致珍羞焉

北史曰穆紹加特進侍中元順與紹同官順嘗因醉入
紹寢所紹擁被而起正色讓順曰老身二十年侍中與
卿先君亟連職事縱卿後進何宜相排突也遂謝事還
家詔諭乃起

唐書官品志曰特進左右光祿金紫銀青等光祿大夫
用人俱以舊德就閒者居之

總敘大夫

白虎通曰大夫為言扶大進人也

毛詩衛淇澳碩人曰大夫夙退無使君勞

大夫未退君聽朝於路寢

夫人聽內事於正寢大夫退然後罷也箋云莊姜始來時諸位大夫朝夕者皆早退無使我君之勞倦以君夫人新為配偶宜親之也

毛詩節雨無正曰正大夫離居莫知我勩

勩勞也箋云正官長也官

長之大夫因厲王流於蕤而皆散處無復知我之勞苦也

三事大夫莫肯夙夜邦君

諸侯莫肯朝夕

箋云王流在外三公及大夫隨而行者皆無君臣之禮不肯勩志朝暮省王也

周禮秋官朝大夫之職掌都家之國治

都家王子弟公卿及大夫之采

地也凡都家之治於國者必因其朝大夫然後聽

禮記曲禮上曰大夫七十而致仕若不得謝

謝去也君念其德而

留之則必賜之几杖行役以婦人適四方乘安車自稱曰

老夫於其國則稱名越國而問焉必告之以其制

他國問其

老者必以制度告也

左傳成上曰衛侯使孫良夫來聘且尋盟公問諸臧宣

叔曰中行伯之於晉也其位在三卿下孫子之於衛也位為

上卿將誰先對曰次國之上卿當大國之中中當其下
下當其上大夫小國之上卿當大國之下卿中當其上
大夫下當其下大夫上下如是古之制也

金紫光祿大夫

晉書曰左右光祿大夫假金章紫綬光祿大夫加金章
紫綬者品秩第二祿賜班位冠幘車服佩玉置吏卒羽
林及卒諸所賜給皆與特進同其以為加官者唯假章
綬祿賜班位而已不別給車服吏卒也又卒贈此位本

已有卿官者不復重給吏卒其餘皆給

光祿大夫

漢百官表曰光祿勳屬官有大夫掌議論

漢書曰谷永既為大將軍王鳳擢為光祿大夫永奏書謝鳳曰永斗筭之材質薄學朽無一日之雅左右之方將軍悅其狂言擢之皂衣之吏廁之爭臣之末

又曰金日磾為光祿大夫親近未嘗有過上親愛之

又曰貢禹上書云貧老家貲不滿萬錢拜光祿大夫賜

益富伏自念無報厚德日夜慚愧

又曰杜陵王仲翁霍光以為光祿大夫仲翁出入蒼頭
廬兒傳呼甚尊寵

又曰蔡義上書曰臣山東草萊之人行能無所比容貌
不及衆然而不棄人倫者以聞道於先師願賜清閑之
譙得舒精思於前上即見說詩甚悅擢為光祿大夫

東觀漢記曰張湛字子孝為光祿大夫數諫湛乘白馬
光武每有異政輒曰白馬生且復諫矣

又曰樊宏字靡卿為光祿大夫為人謙素畏慎每朝會
迎期先到俯伏待事時至乃起帝聞之勅臨朝乃告勿
令預到

後漢書曰鄧太后從樊准議悉以公田賦與貧人即擢
准與議郎呂倉並守光祿大夫准使冀州倉使兗州准
到部開倉廩賑濟慰安生業流人咸得蘓息

又曰魏文帝受禪欲以楊彪為太尉先遣使示旨彪辭
曰彪備漢三公遭代傾亂不能有所損益耄年被病豈

可贊惟新之朝遂固辭乃授光祿大夫賜几杖衣袍因朝會引見令彪着布衣鹿皮冠而入待以賓客之禮

華嶠後漢書曰鄧彪遭後母憂毀瘠過禮因疾乞身以光祿大夫行服

漢書解詁曰武帝以中大夫為光祿大夫與博士俱以儒雅之選異官通職周官所謂官聯者也溫故知新率由舊章皆能明古今辨章句習舊聞者也

漢官儀曰光祿大夫秩比二千石掌議論屬光祿勳門

外特施行馬以旌別之

漢書百官表注曰光祿大夫古官也銀章青綬

魏志曰常林字伯槐河內溫人也時論節操清峻欲致之公輔而林遂稱疾篤拜光祿大夫

又曰黃初四年詔給光祿大夫楊彪吏卒門施行馬

吳志曰八月遣光祿大夫周奕石偉巡行風俗察將吏清濁民所疾苦為黜陟之詔

王隱晉書曰劉毅字仲雄年七十告老以光祿大夫致

仕門施行馬賜錢百三十萬

晉書曰王覽為宗正卿致仕詔遣殿中醫療疾給藥後轉光祿大夫門施行馬

又曰鄭褒景元初疾病失明屢乞骸骨不許遷光祿大夫

又曰華表字偉容歆子太始中拜太子少傅轉光祿勳以老病乞骸骨詔以為大中大夫祿賜與卿同門施行馬

晉陽秋曰李喜乞老以為光祿大夫門施行馬

晉中興書曰王蘊字叔仁烈宗將納后既立徵拜光祿大夫
安曰王蘊地望可與國婚定后既立徵拜光祿大夫

又曰祖納字士言少時操行能言名理遷右光祿大夫
又曰荀組字太章潁川人也弱冠太尉王夷甫見而稱
之為光祿大夫

又曰荀崧字景猷組族子也弱冠太原王濟甚相器重
拜右光祿大夫

又曰賀循字士彥會稽人也節操尚厲童叟不羣言行舉動必以禮讓行有餘力則精書學由是博覽羣書尤明三禮為江表儒宗拜右光祿大夫

又曰顧和字君季瑯族子也和二歲失父總角便有清操弱冠知名叔父瑯雅器之曰此吾家千里駒也興吾宗者必此子矣康帝即位為尚書僕射更拜銀青光祿大夫又遷左光祿大夫

晉諸公贊衛尉傳祗以風疾遜位加光祿大夫開府儀

同門施行馬

齊書曰周盤龍世祖講武令盤龍領軍校尉騁稍後以疾為光祿大夫

後魏書曰李茂字仲宗為光祿大夫茂性謙慎以弟寵盛懼盈滿遂乞以老病固請遜位高祖從之聽食大夫祿還私第

汝南先賢傳曰郭憲為光祿大夫上欲到三輔憲諫曰天下初定車駕未可以巡上遂行憲當車拔佩刀以斷

勃上不止到弘農兵起潁川上恨不用光祿之言於是
帝乃還京

樊英別傳曰詔書告南陽太守五官中郎將樊英委榮
辭祿不降其節志不可奪今以英為光祿賜還家在所
縣給穀千斛常以八月存高年給羊一頭酒三斛

荀氏家傳曰閨字道明性清淨善談論遷光祿大夫以
君面似胡帝謂為神明胡子

太中大夫

韋昭辨釋名曰太中大夫在中最高大也

漢書曰陸賈楚人也以客從高祖定天下以口辨居左右常使諸侯中國初定尉佗平南越因王之高祖使賈賜尉佗印為南越王賈說他令稱臣奉漢約歸報高帝大悅拜賈為太中大夫

又曰東方朔字曼倩平原厭次人也拜太中大夫觀察顏色直言切諫上常用之

東觀漢記曰來歙字君叔南陽新野人也歙有大志慷慨

慨治左氏春秋東詣洛陽見上大喜曰君叔獨勞苦即解被襜褕衣歛拜太中大夫

後漢書曰徵郭伋為太中大夫賜宅一區及帷帳錢穀以充其家伋輒散與宗親九族無所遺餘

司馬彪續漢書曰張湛拜太中大夫病居中東門人號中東門君上數存問賞賜

魏志曰管寧字幼安北海朱虛人也年十六喪父中表愍其孤貧咸共贈賻悉辭不受長八尺美鬚眉與平原

華歆同縣邠原相友黃初四年詔公卿舉獨行君子司徒華歆薦寧文帝以寧為太中大夫固辭不受

又曰韓暨字公至明帝詔曰太中大夫暨澡身浴德志節高潔年逾七十守道彌固可謂純篤老而益劭者也其以暨為司徒

吳志曰裴玄字彥黃下邳人也少有學行官至太中大夫

齊書曰顧憲之字士思風疾求還吳天監二年授太中

夫雖累年宰郡資無儋石及歸環堵不免飢寒

中大夫

漢書曰晁錯對策書百人唯錯為高最乃遷為中大夫
又曰倪寬以侍御史見上語經學從問尚書一篇擢為
中大夫

中散大夫

東觀漢記曰牟長字君高少篤學治歐陽尚書諸生著
錄前後萬人建武十四年徵為中散大夫

後漢書曰魯丕字叔陵遷中散大夫時賈逵薦丕道藝
深明宜見任因和帝朝會召見諸儒丕與侍中賈逵尚
書令黃香等相難數事帝善丕說朝罷特賜幘履襪衣
一襲

續漢書曰譙玄字君黃能說春秋遷中散大夫

柱國

北史曰李敏美姿容善騎射開皇初周宣后樂平公主
有女娥英妙擇婚對勅貴公子弟集弘聖宮者日以百

數公主選取敏禮如儀尚帝女後將侍宴公主謂敏曰我以天下與至尊唯一女夫當為汝求柱國若授餘官慎無謝及進見上親御琵琶敏舞大悅謂公主曰敏何官對曰一白丁耳謂敏可授儀同敏不答上曰不滿爾意邪令授開府又不謝上曰公主有大功於我今授卿柱國敏乃拜舞蹈遂於坐發詔授敏柱國

五代史後唐天成三年五月詔曰開府儀同三司階之極太師官之極封王爵之極柱國勲之極近代已來文

臣官階稍高便授柱國歲月未深便轉上柱國武資不計何人初官便授上柱國官爵非無次第階勲備有等差宜自此時重修舊制今後凡是加勲先自武騎尉經十二轉乃授上柱國永作成規不令踰越雖有是命竟不草前例

奉朝請

漢書曰王陵為太傅杜門謝疾竟不朝請
續漢書曰前漢列侯奉朝請在長安位三公漢武帝之

時宣帝為皇曾孫令奉朝請

東觀漢記曰建武中鄧禹失司徒特進奉朝請

漢官解詁曰三輔職郡守獨奉朝請成帝丞相張禹遜位特進奉朝請又以關內侯蕭望之奉朝請奉朝請之號則非為官如淳曰諸侯春朝天子曰朝秋曰請雖國戚及勲門子弟為之但預朝請而已

晉起居注曰孝武寧康三年詔隴西王世子越駙馬都尉楊邈並可奉朝請侍從左右與太子遊處

沈約宋書曰奉朝請無員外不為官漢東京罷三省公
外戚宗室多奉朝請奉朝請者奉會朝請名而已

又曰王敬弘子恢之被召為秘書郎敬弘求為奉朝請
與子恢之書曰秘書有限故有競朝請無限故無競吾
欲使汝處於不競之地太祖嘉而許之

北齊書曰祖鴻勳為州主簿僕射臨淮王彧表薦鴻勳
有文學宜試一官勅除奉朝請人謂之曰臨淮舉卿便
以得調竟不相謝恐非鴻勳曰為國舉才臨淮之務祖

鴻勳何事從而謝之或聞而喜曰吾得其人矣

後魏書曰崔光韶事親以孝聞初除奉朝請光韶與弟光伯雙生操業相侔特相友愛遂經吏部尚書李冲讓官於光伯辭色懇至冲為奏聞高祖嘉而許之

又曰裴詢字敬叔美儀貌多藝能音律博奕咸所閑解起家奉朝請

又曰梁景伯生於乾桑少喪父以孝聞家貧傭書自給養母甚謹尚書盧淵稱之於李冲冲時典選授為奉朝

請

致仕官

晉書曰王祥致仕詔賜几杖牀帳簟褥以舍人六人為
睢陵公舍人

又曰鄭冲致仕詔賜安車駟馬牀帳簟褥

五代史曰鄭韜以戶部尚書致仕自襁褓迨於懸車事
真偽十一君凡七十載所仕無官謗無私過三持使節
不辱君命士無賢不肖皆恭已接納晚年背偃時人咸

曰鄭樞不迂平生交友之中無隙怨親族之間無愛憎
恬和自如性尚閒簡及致政歸洛甚愜終焉之旨

太平御覽卷二百四十三